



Cumün da vaschins Zernez

Protocol

Radunanza da vaschins da venderdi, als 17 december 2021, a las 20.00, ill'aula dal center cumünal a Zernez

Preschaints: 14 vaschinas e vaschins cun dret da vuschar
S-chüsats: Seraina Bickel

Tractandas:

- 1. Salüd e bivgnaint**
 - 2. Tscherna dad ün fin duos scrutinadurs**
 - 3. Protocol da la radunanza dals 29 avrigl 2021**
 - 4. Natüralisaziuns**
 - Dumonda da duonna Vania Bras per dvantar vaschina da Zernez
 - 5. Approvaziun dal quint cumünal dals vaschins da Zernez pel 2020**
 - Rendaquint 2020
 - Rapport da revisiun
 - 6. Orientaziuns e varia**
-

1. Salüd

Il president salüda la radunanza e giavüscha la buna saira. El constatescha cha la bannida es ida oura per temp sco üsità e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna dad ün fin duos scrutinadurs

Sco scrutinadura vain tschernüda duonna Anna Zala-Buchli.

3. Protocol da la radunanza dals 29 avrigl 2021

Il protocol es stat expost illas assas nairas e sülla pagina d'internet dal cumün. El vain approvà sainza discussiun.

4. Natüralisaziuns

Duonna Vania Bras abita daspö ch'ella vaiva 3 ons a Zernez, ingio ch'ella ha passantà l'intera infanzia. Però fingià quella vouta cha la famiglia d'eira gnüda a star a Zernez d'eira ella gnüda sü da Susch, uschè ch'ella d'eira amo avant abitanta dal cumün da Zernez dad hoz. Ella ha frequentà a Zernez tuot las scoulas obligatoricas ed ha cuntinuà sia scolaziun a l'Accademia Engiadina a Samedan ed a la Scoula media

evangelica ad Aschera. Uossa frequentia ella la Scoula ota da pedagogia dal Grischun a Cuaira. Ella finischa sia scolaziun cun üna lavur in rumantsch e frequentia natüralmaing la partiziun rumantscha da maniera ch'ella po lura dar scoula eir in cumüns rumantschs.

Als 10 da settember, ha il cumün surgni la conferma da l'Uffizi chantunal da migraziun e da dret civil a Cuaira cha la documainta e las pretaisas legalas per ün vaschinadi sajan examinats e sajan in uorden. Als 12 da november han trais commembers da la suprastanza dals vaschins da Zernez fat cun ella il discuors da natüralisaziun cun las dumondas d'examinaziun pretaisas. La suprastanza propuona uossa sainza cuntravusch dad acceptar la dumonda da vaschinadi.

La radunanza segua a la proposta da la suprastanza sainza cuntravusch ed accepta la dumonda da duonna Vania Marisa Bras da dvantar vaschina da Zernez.

5. Approvaziun dal quint cumünal dals vaschins da Zernez pel 2020

Il president dals vaschins, Rico Zala, preschainta detagliadamaing il simpel quint cumünal. Il cumün da vaschins ha chaschunà d'ürant il 2020 spaisas da fr. 3365.90 quellas vegnan pajadas dal cumün politic chi ha la giodia dal possess dals vaschins. Implü haja dat entradas da taxas da vaschinadi da fr. 1350.- quellas augmantan per la fin dal 2020 il chapital dals vaschins sül conto da passagi manà da l'administraziun dal cumün politic sün fr. 15'152.90.

Daspö trais ons pretenda l'Uffizi chantunal da cumüns cha'ls cumüns da vaschins mainan ün agen quint. Daspö lura, dimena uossa per la terza vouta, ha il cumün da vaschins da laschar reveder seis quint ed in seguit laschar far bun quel da la radunanza da vaschins.

Fabian Schorta prelegia il rapport da revisiun cha'ls trais revisurs da quint preschaintan per mans da la radunanza cun proposta da far bun il quint e dar dis-charg als organs respunsabels.

La radunanza segua a quella proposta cun unanimità da vuschs.

6. Orientaziuns e Varia

Il president da vaschins, Rico Zala, orientescha cha quist on vegna darcheu fatta üna loipa da passlung sül plan da Buffalora chi as rechatta sün territori dal cumün da Val Müstair, ma chi'd es in possess dal cumün da vaschins da Zernez. Peider Andri Toutsch chi realisescha fingià il seguond on quella loipa, ha dumandà il permiss al cumün da Zernez. Ils respunsabels dal cumün politic han dat quel permiss ed han lura orientà dal fat eir al cumün da vaschins chi'd es il possessur dal terrain.

Implü orientescha il president, cha d'ürant tuot quist on nun haja quai per üna vouta dat ingünas natüralisaziuns simplifichadas per confamiliars da vaschins da nos cumün. Quellas natüralisaziuns simplifichadas per confamiliars vegnan adüna trattadas be da la confederaziun ed il cumün da vaschins vain lura be amo orientà dal fat accumplici.

Da la tractanda varia nu vain fat oter adöver.

La radunanza po gnir serrada a las 20.29

Il president:

L'actuar:

Rico Zala

Hermann Thom